

“ eo lacte, sapientis venia impetrata, frui cupio, ac si esset sexta pars terræ  
“ custoditæ.”

67. Ita compellata a rege, VASISHTHÆ vacca magis etiam delectata erat, atque illo sequente ex *Himavantis* caverna sine lassitudine rediit ad eremum.

68. Regum princeps ille, cujus facies lunæ serenæ similis erat, vaccæ gratiam, magistro suo indicatam, uxori, quæ jam e lætitiæ signis eam conjecerat, iterum quasi narravit.

69. Tum ille, irreprehenso animo præditus, bonorumque hominum amicus, a VASISHTHA jussus, NANDINIS lac, quod a vitulo atque post sacrificium peractum relictum erat, bibit magna cum siti, ac si fuisset candida ipsius gloria, corpore induta.

70. Postero mane, voto ita exsoluto, VASISHTHAS, prosperum iter iis precatus, conjuges ablegavit ad urbem suam regiam.

71. Rex, postquam salutaverat sacrificium, ignem atque ARUNDHATIM post illius maritum, vaccamque cum vitulo, profectus est, dignitate per felicitatem amplificata.

72. Patiens ille cum uxore legitima viam faciebat curru, sonitu suo auribus blandiente, non interrupto, jucundo, suo quasi desiderio expleto.

73. Cives biberunt eum, cujum corpus emaciatum erat per votum pro filio obtinendo exsolutum, et qui absentia sua desiderium eorum excitaverat, oculis satietatem haud adipiscentibus, recens ortam veluti lunam, herbarum dominam.

74. Ille, INDRÆ felicitate fruens, urbem, vexillis erectis ornatam, ingressus, salutantibus civibus, terræ onus reposuit in brachium suum, serpentium principis instar robustum.

75. Atque tum, veluti cælum recepit splendorem, ex ATRIS oculo ortum, veluti flumen cœleste SIVÆ semen, ab igne evomitum, ita regina, ad familiam regis propagandam, concepit fœtum, gravibus indiciis regiis præditum.